

REGIONAL NEWS

HEADLINES:-

1. Larsap Dr Hari Babu Kambhampati an vawiin khan Right to Information Week 2023 a hawng.
2. Chief Minister Pu Zoramthangan tunhnaia school 180 sorkar school-a hlankai chu sawrkarna an chelh leh a nih chuan tha taka kalpui theih an inring tih a sawi.
3. Deputy Chief Minister Pu Tawnluia'n vawiin khan Aizawl Smart City Limited hmalak tanna hrang hrang a telpui.
4. Mizoram State Information Commission-a Chief Information Commissioner leh State Information Commissioner te vawiin khan lakluh an ni.

<><><>

RTI WEEK

Larsap Dr Hari Babu Kambhampati an vawiin khan Right to Information Week 2023 a hawng.

Hawna inkhawmah hian Governor chuan kumin RTI week chu hlawhtling taka hman a nih a beisei thu a sawi a, Mizoram Information Commission, General Administration Department, leh Information Communication Department ten Mizoram RTI online an duan chhuah chu hmang tangkai turin mipuite a chah a, internet leh phone nei remchang lo te pawhin common centre leh KIOSK an hman tangkai theih thu sawiin RTI hmang hian langtlang sawrkar a siam theih bakah mipui ten roreltute an khalh ngil na hmanrua a ni a ti bawk.

Chief information Commissioner Pu John Neihlaia chuan RTI chu uar lehzuala hman a duh thusawiin, RTI Act chu mipuite ti chak tu tur leh tangkaipui tur a nih thu a sawi bawk.

He hunah hian RTI Act hmang tangkaitu Central YMA President hlui Pu Vanlalruata leh thuthar lakhawmtu Pu F Lalliansanga ten an tawn hriatte an sawi bawk.

Vawiin hian Governor chuan RTi logan Competition a zirlai intihsikte lawmman a sem a, RTI Week hi kum tin October ni 5 atanga ni 12 inkarah hman thin a ni.

<><><>

INTEGRATED CHECK POST

Commerce and Industries changtu Minister Dr. R Lalthangliana'n ram thenawm te nena insumdawn tawna kawng awlsam zawk siam turin Mizoram sawrkarin theihtawp a chhuah tih a sawi a, sawrkarin Integrated Check Post siam turin hma an la mek a ti .

Akashvani Correspondent nen an inkawmna ah he thu hi sawiin Dr R. Lalthangliana chuan hmasawna lian tham awm turin a department mai bakah sawrkar laipui leh ram thenawm sawrkar ten chak takin hma an la a ti a, Integrated Check Post siamna tur Kawrpuichhuah ah a hmun tur ram pawh tihfel tawh ani tih sawiin hei hi pui thiam tak tur a ni a ti a, warehouse lian tak, post office leh Bank te leh thil ken tel lian tham tak tak a awm dawn tih a sawi.

Minister chuan ram thenawm Bangladesh atanga hotute lo kalin an en ho tawh thu sawiin India Sawrkar laipui pawh Myanmar ah sipai sawrkar a din rih avangin insumdawn tawn a rem rihlohna tam tak a awm avangin Bangladesh nena insumdawn tawna lam an hawi a ti a, cheng vbch 552 DPR peih vek tawh niin sanction theih turin Sawrkar laipuia Cabinet meeting ah chhawp chhuah nghah mek a ni tiin a tlang ngei an beisei tih a sawi bawk.

Commerce & Industries Minister chuan Land Port Authority of India in tun hnaiah Border Trade lian chi Land Custom Station chu India rama 20 an thlan chhuah zingah Mizoram in 2 an chang thei dawn a ti a, Zorinpui ah leh Zokhawthar ah te ruahmanna kalpui ani tih a sawi bawk.

Minister chuan Mizoram hmun hrang hranga Indo Myanmar border leh Indo - Bangladesh border ah te Border Haat awlsam taka insumdawn tawna tur a awm theih nan hmalak mek ani a ti a, reilote ah a hlawhtlinna hmuh thuai an in beisei tih a sawi bawk.

<><><>

CM

Chief Minister Pu Zoramthangan tunhnaia school 180 sorkar school-a hlankai chu sawrkarna an chelh leh a nih chuan tha taka kalpui theih an inring tih a sawi.

Vawiin khan Mizoram Government Adhoc Aided School Teachers Union (MIGASTU) ten tun hnaia Council of Ministers in an member school 180 te sawrkar school atana a hlan kai sak lawmna inkhawmpui lian Aizawl Chanmari YMA Hall a an buatsaih a hmanpuinaah he thu hi sawiin Chief Minister chuan sawrkarin sum leh pai hnar tha zawk a neih theih nan Resource Mobilization Department a siam thar a, chungte chu tangkai takin an hmang dawn a ti.

Chief Minister chuan, ramin hma a sawn theih nan thil pawimawh tam tak awm mah se zirna leh hriselna te hi nitina mamawh mitin nghawng a ni a. Sum leh pai harsatna karah sawrkar chuan heng pahnih tan hian theihtawp a chhuah reng thin a ti a, Sum leh pai tam tak a mamawh tel avangin mi thenkhatin a taka kan kalpui theih an ring lo mai thei a. Amaherawh chu Pathian leh mipuite zarah tha taka an kalpui theih an inring tih a sawi.

He hun hmanpuitu dang Pu Lalchhandama Ralte pawhin thusawiin, tun dinhmun thleng tur hian dan hautak leh kawng thui em em siam hmasak a ngai a ti a. Chu dan chu September ni 24 khan peih fel a ni a, a hnu ni thumah September ni 27 khan Council of Ministers chuan a pass a. A tuk ni 28 ah Ministry of Education dawrin Delhi a kal nghal a, Government Facilities dawn theihna tur a sawi fel a ti a, Ni 29 khan sawrkar school a dah an nihna Notification an tihchhuak nghal bawk a ti.

School Education Director Pu Lalsangliana chuan provincialised hmu school 180 te kaltlang hian chawp leh chilhin chungkaw 1422 ten hlawkna an tel nghal a ti a, school dang dinhmun tha zawka hlankai zawng zawng te nena belkhawm phei chuan chungkaw 2748 ten hlawkna an tel nghal a ti a. Hetiang taka sawrkarin a ngaihtuaha, dinhmun tha taka a dah chhan chu Mizoramin zirna tha a neih zel theih nan a ni, a ti.

<><><>

SERCHHIP GHSS

Serchhip-a Govt. Higher Secondary School-a zirlaite chuan an School-a Zirtirtu indaihloh avanga sawrkar nawr nana badge dum an bel hnuah thu lawmawm an hmuhloh avangin vawiin atang khan Class la lo in an nuar.

Serchhip Govt. Higher Secondary School-a zirlaite hian an School-a Zirtirtu te sawn chhuah an nih hnua an aiawh tur dah leh annih loh avang leh zirtirtu indaihlohna avanga zirna kawngah harsatna an tawh avangin nimin piah atang khan Badge dum an bel tawh a, ni 2 chung Badge dum an belh hnuah pawh sawrkar atanga thu lawmawm an dawn loh avangin vawiin atang khan School kal tho chungin Class an la lo tih kan corr thudawna chuan a sawi a ni.

Govt HSS Serchip a zirlai hruaitute chuan , History,Mizo, Physics leh Chemistry Subject ah te Zirtirtu dah belh an ngiat a, tunhnai September ni 26 khan Samagra Shiksha hnuaiah Chemistry Zirtirtu chu attached-in sawrkarin lo dah lailawk tawh mahse zirlai ten an phut ang Zirtirtu pek an la nih loh avang hian nimin piah atang khan Badge dum lo bel tawh a, thla hmasa September 20 khan an School-a Zirtirtu dah belh phut hian lungawi lohna lo lantir tawhin Serchhip-a MNF Party hruaitute nen inbiakna an neih hnuah lungawilohna lantir kawngzawh an tum pawh anlo thulh lailawk tawh a ni.

<><><>

AKASHVANI INTVW

Akashvani Aizawl, Regional News Unit in district thar 3- Saitual, Hnathial leh Khawzawl bakah Aizawl Dist-a Part Time Corresspondent a lak tura diltute interview hun atan karleh thawhtanni Oct ni 9 khi ruat a ni a, Aizawl Tuikhuahtlanga Akashvani Stationah chawhma dar 10 ah kim vek tur a ni a, document pawimawh zawng zawng endik tura ken tur a ni bawk a ni.

<><><>

DY CM

Deputy Chief Minister Pu Tawnluia'n vawiin khan Aizawl Smart City Limited hmalaknaa MINECO Multi Level Parking bula hmun ruak ah, mipui vangtlang tana tual lenna tur project 'Construction of Urban Landscape & Avenue Plantation' tih lungphum a phum.

He hmunah vek hian Deputy Chief Minister hian Smart City hmalakna thoa, Ambulance changkang chi 5G/Smart Ambulance leh khawpui huam chhunga YMA Branch te hnenah kangmei a chhuah palha thelhna tur hmanrua 'Portable Fire Fighting Pump with Ancillary Equipment' a hlan bawk a ni.

Pu Tawnluia chuan Aizawl Smart City hmalakna leh ruahmanna kaltlanga Aizawl khawpui hmel thar lang mek chu lawmawm a tih thu a sawi a, Smart City hnuaia project chu a hun pawhsei niin nakum June ah project te hi zawhfel vek a ngaih avangin heng hna te hi a hun taka zawh a nih theih nan a thawktu zawng zawng te theihtawp chhuah turin a chah a ni.

Construction of Urban Landscape & Avenue Plantation hi cheng nuai 972 senga MINECO Multi Level Parking leh Open Gym MINECO inkara hmun ruaka sak tura ruahman a ni a, 5G/Smart Ambulance hi Aizawl Civil Hospital, Zoram Medical College bakah private damdawiin 6 te pek tura ruahmanna niin vawiin khan 2 chu Health & Family Welfare Department hnenah hlan a ni a, a dang paruk te chu tun thla chhunga

hlan tum a ni. Khawpui huam chhunga YMA Branch 108 te hnenah kangmei a chhuah palh a a ti mitna tur hmanrua 'Portable Fire Fighting Pump with Ancillary Equipment hi vawiin khan engemaw zat CYMA hnenah hlan a ni a, adangte pawh a lo thlen in a tahtawlin hlan a ni ang. Heng hmarua leh Fire Tender 4 lei nan cheng nuai 446 sen a ni dawn a ni.

<><><>

CIC SWEARING IN

Mizoram State Information Commission-a Chief Information Commissioner atan IGP Pension Pu John Neihlaia leh State Information Commissioner atan Doordarshan (News) Aizawl Director atanga pension Pu Mangjangam Touthang te chu vawiin khan Larsap Dr Hari Babu Kambhampati an rinawmna thu tiam tirin a la lut.

Mizoram Lokayukta member atan Pu Lalsanglura Senior SP, Anti Corruption Bureau chu Governor hian a la lut bawk.

Chief Secretary kal chhuak ta Pu Lalnunmawia Chuaungo chu kumin July ni 19 khan Chief Information Commissioner hna a ban san a, Congress Party ah lut zuiin, Chief Information Commissioner hna hi IGP Pension Pu John Neihlaia'n a chelh dawn a ni.

Vawiin inkhawmah hian Chief Minister Pu Zoramthanga, Deputy Chief Minister Pu Tawnluia bakah Minister leh MLA te an tel a, Sawkar hotulu pawimawh an tel bawk a ni.

<><><>